

K E R W E R E D D 2002



vorgetragen von Kerweborsch Philipp Meon

Erlabt mer, daß ich oan erschder Stell
unser Kerwekomitee mol vorstell.
Als erschdes unser Kerwekönischin,
hübsch wie eine Schauspielerin,
kraziös wie eine Ballerina
es is unser Ohlhausers Ina.
Steffi Silber und Carmen Weber als Prinzessinne,
groad a sou zwa hübsche Biene.
Erschder Kerweborsch er Leit
is de Philipp Meon heit,
moine Wenischkeit.
De zwodde und de dritte Kerweborsch, Christian Werner und Boris Jakobi, de Urenkel vum
August Schorsch.

Jedes Johr is des jo sou,
do foang isch mit de Redd jetz ou.
Doch vorher muß ich moi Keele,
mit em e gure Eckweg eele.

Er liewe Leit es is endlich sou weit,
Hoambecher Kerwe ist were heit.
Veel Auswärdische häwwe sich werrä oigfunne,
all die mit unsere Kerb vebunne.
Drumm griß ich all die noamhafft,
oischließlich der bugglische Verwoandschaft.

All wu e gut Kerweesse und Gastfreundschaft suche,
oischließlich Weck Woarscht Woi und Riwwelkuche.
All wünsch ich eisch er Leit,
en gure Hunger und veel Spaß heit.
Als erschdes bring ich woas es Johr iwwer
bassiert, basst uff, daß ers a all kappiert.
Die Fassnoachter häwwe beim Stroßeumzug schlau,
fleisich gsunge und gegresche hellau.
Ouschließend sin se zum Gerhard, dem Owwermaschores goange,
der hot se zum Geburtsdoagsfeiern empfoange.
Wie se kumme sin, war de Gerhard goanz iritiert,
des is em in soim Läwe noch net bassiert.
Wie de Elferrat kumme is zu em hoangfahn, daß se all stocknüchtern warn.

All noch kerzegroad geloffe,
net oaner war e bissel vollgsoffe.
Ä fregt se, woas häwwe se doan mit eisch gemoacht,
do häwwe se gsoad un goanz verscheemt gelacht,
„Vor lauder Begeisterung und Hellau häwwe mer indesse, woas zu trinke mitzunemme vergesse“
Noch net emol e Flasch Bier orrä Woi,
doan de Elferrat muß doch Trinkfesdch soi.
Woan des es negschde Johr noch emol bassiert, wern se vun de Fastnoacht disqualifiziert.
Dodenoch hot mer vun Leit gehäiet äwwer,
daß se beim Gerhard alles nochgeholt häwwe.
Un doan is moanscher owends speet ganz bedaggelt, schwoangend wie en Binguin hoamgewaggelt.
Un de ledschde Gedoange dehoam im Bett,
es negschde Johr vergesse mer unsern Woi net.
Moral defu is, a ohne Bier un Woi,
kenne die Hoambecher in Stimmung soi.
Sie kenne frou soi und vun Herze lache,
des solle die Hepprummer ersdch noch mache.
Geb mer mol moin Bescher,
bevor isch noch verläscher. Prost!!

Oaner hot soi Gschäft uff Hepprum verläigt,
en moansche hot sich driwwer uffgeräigt.
Ä is foaneflischdisch woan,
sou schnell schmeist mä net die Flind ins Korn.
Sogar die Uhr horrä mitgenomme,
daß der sich noch traut noch Hoamboach zu kumme.
Woan ä jetz noch wollt bei em kaafe,
misst ä noi uff Hepprum laafe.
Ball häwwe mer in Hoamboach koa Gschäfte mäi, erlich gsoad des dutt wäi !
Poscht, Sparkass, Mitschebäcker, Rebstock zu,
Miller un Metzger häwwe schon loang nix mäi zu du. Bauern und Winzer sinn a nur noch e paar,
a do grischde jo die Penosbera.
Wer waas, woas uns noch alles bliht,
bald is Hoamboach Noutstandsgebiet.
Ball is es er liewe Leit,
in Hoamboach sou weit.
Moansche häwwe noch net emol en Kihlschroank im Haus,
die henge die Butter und de Kees in de Plasdikdutt zum Fenschder naus.
Garnet vun do weit weg, do owwe in de Neh fum Eck.
Feleischd a weil dä Kees dutt stinge,
isch muss jetzt ersdch emol oaner dringe. Prost

Oaner aus de scheene Wasserschepp,
is doch schunschd a koan Depp.
Hot sich noch eme schene Film gsehnt,
drumm horrä sich en Video ausgelehnt.
En Film druff superstark,
er koschd jo blous zwaa Mark....de Doag
Souweit war alles klar gerizt,
doch es oabgäwwe hot er goanz verschwitzt. Noch e paar Woche is em e Moahnung kumme,
er hot die Rechnung in die Hoand genomme.
Er konnt es garnet glaawe,
es hot ehn faschd vum Stuhl gehaawe

es warn noinzisch Mark.
des woar stark.

Voar zwaa Mark hot er des Video bestellt,
drei heerä kaafe kenne vun dem Geld.
Liewer Bu du uffbasse,
un net doi goanz Geld verprasse.
Die Kabell wärd erschd emol oaner speele,
isch muß emol moi Gorgel eele. Prost!

Vun de Johreshauptversoammlung war oaner uff de Hoamfahrt.
Hot sich schon uff soi warm Bett gfraad,
un weil er not en Moment gepennt,
horrä en Ladännepohl umgerennt.
Es hoten net wairä uffgeräigt,
er is hoam un hot sich in soi Bett geläigt.
Zum Pesch horrä bei denne Bosse,
soi Nummernschild oam Poschde laie losse.
Un zwar vum Audo oan de Stoustoang vorne,
drumm hot a gleidruff die Bolizei oan de Hausdeer gschdoanne.
Es hot em nix genitzt, koa schenne und koa fluche, jetzt kann er soin Fihlerschoi in Flensburg
besuche.

Er Leit seit nett glei schoarefrou,
jeder Mensch kann emol Pesch hou.
Wolle mer na fä ehn hoffe,
daß soin Labbe ball werrä oigetrotte.
Weil des jedem mol bassiern kann,
a em me sehr verdiende Moan.
Der woar a schon friä Kerweborsch,
jetzt trink isch emol werrä, isch häbb Doarschd. Prost!

So e paar Schlaue mer glaabt` s koam,
sin in Hepprum in de Disco zum Abbelboom.
Donoch wollde se zum MC Donald esse gäi,
a net blous Dorsch a Huger, der dutt wäi.
En Daal is mim Audo noi und e paar sind geloffe, weil die ledschde warn e bissel besoffe.
Drinn beim MC Donald oukumme,
häwwe se glei Platz genumme.
Doch oaner sou en Dolle,
wollt sich oam Audoschalder en Big Mac holle.
Der oam Schalder säischd - gäin se ins Lokal roi, do gibt's blous Esse dorsch die Audoscheib noi.
Der Bu war äwwer garnet dumm,
gäit oans Audo un dreht` s noch net emol um. Fäiät goanz loangsoam im Rickwärtsgoang,
läscheld oan dem Schalder loang.
Un er glaabts veleischd net,
prommt hot er soin Big Mac gritt.
Doan is er schnell mim Fuß uffs Gaas,
die Hauptsach, daß mer sich zu helfe waas. Jetzt häiä isch emol korz uff,
un die Kabbell mach oaner druff. Prost!!

E Jugendgrupp hot bis in de Noacht,
im roschdische Messer verbrocht.

Oaner is uffs Klo gerennt, es hot pressiert,
do is em folgendes bassiert.
Er ziegd und trickt uff die Deerschling druff,
die Deer gäit ums Verregge net uff.
Weil er sou in de Raasch,
horre schon en moads Druck im a woas denkt den er.
Mit der Wädinn horrä gschend,
ob sem net die Deer uffmache kennt!?
Die säischd du dummer Bu,
die Deer gäid nauszu uff, un noizu zu.
Er hot äwwer oam verkeerde Daal getrickt,
deshalb iss es ehm a net geglickt.
Er hot sich net belehrn losse,
inzwische war alles in de Hosse.
Woas war des friä sou oafach im Rousedaol,
die Leit warn sefreere mittem ä Raal.
Es hot zwar e bissel gschdunge,
äwwer jetzt wärd erschd emol oaner getrunge. Prost!!

Im Owwerndorf hot leschd sou en Dolle,
soi Rävewelle verbrenne wolle.
Des Feiersche hot schee gebrennt
Ä schdäid denäwe un wärmd soi Hend,
plötzlich is, es is net geloche,
en Funk uff de Kopp druff gfloche.
Im Nu hot des scheene Hoor gebrennt,
wie es Rumbelstilssche is er rummgerennt,
als werä mit Hasch gedopt, un hot sich uff de Kopp gekloppt.
E Gsischd horrä gemoacht wie e Fraa in Wäie,
soin Kopp hot wie Hingel in de Mauser ausgsäie.
Des schenschde is woas isch eisch soach,
daß er erschd zwaa Doag vorher beim Friseer woar.
Des Geld heet er sich sparn kenne,
Seikepp dutt mer jo a schoawe oder oabflemme.
Ob ä jetzt Parrä wärn will, der aarme Tropp,
e Tonnsur horrä jo schon uff em Kopp.
Die Kabell speelt jetzt emol en Marsch,
gäb mer mol moi Flasch. Prost!!

E paar Jugendliche nett sou oald,
woarn kerzlich emol im Ourewoald.
Un weil se ze oacht warn,
sind se mit emme Kleinbus gfahn.
Sie wollde zueme Rockkonzert,
hinnedraus hinner Färd.
Wie se oam Ziel sin oukumme,
häwwe se glei oaner zur Bruscd genumme.
Zuledschd is es lousgoange in allene Ecke,
gedoanst häwwe se wie de Lump oam Schdägge.
Hi und hä sin se gehibbelt,
häwwe sich die Äärm verknibbelt,
die Boa häwwe ausgsäi bei däre Doanzerei,
wie än Rucksack voll Härschgeweih.

Rumgehuppst sin se doan goanz ä,
die Zung war inzwische rabbeldä.
Die Klaarä vun inne oabgenutzt,
inzwische fleisch die Gorgel gebutzt.
Bis se oam En goanz hei warn,
sin goanz bedorzelt hoam gfahn.
Unnerwägst doann goanz schee voll,
kumme se in ä Bolizeikontroll.
Sie häwwes äwwer gonz gut getroffe,
de Fahrer war de oanzischd wu net gsoffe.
Un weil er nix getrunge,
hots de Bolizei gonz schee gschdunge.
Ä hot bloose misse in die Dutt,
zum Glick war groad des Gerät kabbut.
Do dunsen ausem Audo holle,
wärrem Drogetest horrä pinkle solle.
Un weil die Mädschin guggde zu,
hots ums Verregge net gedu.
Do horre Pepsi tringe misse,
un endliche konnt ä Wasser losse.
Bei däre gonze Kontrolliererei,
war ach e Bolizischdin debei.
Während ä noch Pepsi schluckt,
hot die aom meischde hiigeguckt.
Die Businsasse warn schon oam lache,
e Fahrerin sollt wäirä mache
isch moan mim Fahrzeug lenge - net woas er dut denge.
Un des war jo de gräischde Spott,
weil di jo Bier getrunge hot.
Doch alles hot en gure Laaf genumme,
sie sind a glicklich hoam doan kumme.
Moral, woan die Bolizei will Hoambecher läige noi,
mus se e bissel schlauer soi.

Un zum Oabschluß trink isch noch en Woi,
doan is die Kerb ach unse,
un isch konn a gut Kerb feiern.
Wem is die Kerb.....!!!!!!!!!!!!!!